

四庫全書

集部

欽定四庫全書

集部

遜志齋集卷二十三

詳校官編修<sub>臣</sub>曹城

中書<sub>臣</sub>劉源溥覆勘

覆校官中書<sub>臣</sub>朱鈐

校對官中書<sub>臣</sub>吳紹昱

謄錄監生<sub>臣</sub>張曾秀

欽定四庫全書

遜志齋集卷二十三

明方孝孺撰

古詩

蜀府敬慎齋

天降大命孔神而明巍巍天位匪德莫承赫赫聖皇天  
實子之奄宅九有不冒四夷百辟是臨兆民是使何遠  
弗綏何悍弗靡德威所加孰不震驚尚篤祗慎以奉天  
明矧惟哲王有此大國天子之祐之寵之錫君子西土

厥壤汪汪喬岷大江式固其疆有臣有民有隣有輔外  
有戎羗于徼于圉匪格以誠孰克潛乎匪治以仁疲羸  
曷蘇教之禦之以恩以禮攘之訓之威武豈弟天有顯  
任舉集王躬惟克敬慎迺寧家邦惟聖天子肇基百世  
衆建藩輔以匡來裔厥或罔恭民亦罔從厥或弗慎下  
孰敢信惟王迪德懋昭大猷日宣聖學以祇天休惛惛  
于思夔夔于守穆穆語言不驚左右視乎在服有秩有  
倫視乎在廷紀法具陳視乎禁衛動有矩律視乎郊圻

靡有迨逸云孰致之敬慎使然惟克敬慎迺罔有愆惟  
爾今王天子攸倚四國攸喜下民攸恃王于齋宮吉士  
祁祁教言徐徐溫其有儀蹢躅黃髮忠嘉啓告直辭靡  
撓不怒以笑古昔格王永有烈光彼或慢肆福祿靡常  
王耽稽古天下取則宜其邦國稽古惟王邦國以康  
嗣用昌天佑大明藩輔多賢宜于民人於千萬年

讀書齋

翼翼高齋秩秩群經推辭繹義必敬必誠持心惟虛是

受是承立志惟篤是毅是弘恢廓其量可吞滄溟奮作  
其勇若捍都城求之勿易思之勿更取之欲博約之欲  
精聖言何疑不疑不明聖道何正不正不平融會其殊  
操植其恒朝斯夕斯期乎有成外怯不足小德微能內  
有若無盎盎乍盈惟仁之居惟義之貞霽月之明止水  
之澄天君明泰我縱我橫道無不得理無不形富貴敝  
屣子女酷刑難玷污辱寧過潔清大之天下小之家庭  
是經是緯是章是程聖讀庸行馬牛冠纓博覽孔殷書

匱是銘允矣君子夜寐夙興惟誠惟勇有權有衡聖訓  
赫臨于几于楹聖經是讀聖德是行

四月一日蒙賜宴浣花新建草堂感恩懷古偶作  
靈雨過瑤階朝陽麗金殿吾王講藝餘特賜群儒宴茲  
惟杜子宅遺址當郊甸盛代仰前脩高堂歛重建葺茅  
昭舊迹拓地增新觀棟宇極崇華簷甍儼雕煥兩楹陳  
綺席僊醴兼珍膳列坐無俗賓銜恩共酬勸花溪浮砌  
淨雪嶺當窻見覽物獨興懷古人如對面追思天寶後

宇內疲征戰徒抱稷契心莫覩唐虞禪薄游經險阻放  
意娛篇翰使獲遭聖明寧令老貧賤人生鮮遇合自昔  
共嗟惋並世或棄捐千秋有相羨吾曹獨何幸淺技蒙  
深眷難報國士知空為昔賢歎江山鍾粹美天地存幽  
贊佇俟英俊興重看盛文獻

臣近述基命錄粗載三代帝王寬厚之政以寓忠  
愛之私幸徹睿覽過蒙賜詩寵褒詞高旨遠復  
增慚荷謹依韻畧陳情以謝萬一云



明哲昔御世虛心禮賢臣令名昭簡策千秋播清芬  
賢王啓大藩懿德貞且純英姿邁前烈高志企古人聖學  
自得師曠代莫與鄰睿謨粲可述善政難具陳况復抱  
雄才著作妙入神下筆百川湧潤澤義與仁陋儒亦何  
幸趨召奉絲綸恩言寵賜褒猥謂堪致君仰惟文獻國  
濟濟申白賓圖治超太古餘光能見分謹歌擬雅頌烜  
赫繼丘墳

齋殿觀書恭侍間燕且承賜文嘉勞無任感服謹

賦詩一首以抒下情

無為運王化虛靜契天心神情既昭朗外誘安能侵  
齋居閱道妙端拱肅冠襟超然萬彙表儼若上帝臨  
竹素粲盈前群言恣窺尋遐思自知要博采仍鉤深  
嗜古忘飢渴好善踰球琳冥觀會衆理抗志珍分陰  
俯仰周乾坤瞬息貫古今人爵已莫並天貴誰能任  
賑窶散倉粟贖人捐府金政教洽四境蒼生歌德音  
文昭聖明喜誠格鬼神歆陋儒荷寵光避席瞻旒簪  
垂歡惠顏色灑翰

嘉忠忱瀚海茫無涯豈復資蹄涔譬彼一簣土寧補泰  
華岑受恩徒徬徨憂懷鬱欽欽鴻勲希旦奭令名仰回  
參日新崇大業濟世同舟霖

臣仰德之深非言可喻謹次淵明九日詩韻叙謝

萬一

至人憲天德虛心體群生自為代工計豈為濟衆名惟  
王間世才欽聖奉天明端居澹無欲四海流仁聲耄倪  
競稽首願王壽千齡如彼岷峨高不騫復不傾小臣最

陋劣夙受顧盼榮孤恩愧明義念舊勞睿情臨風拭病  
目思見德化成

癸酉歲京府徵考試繼奉蜀王殿下命述事

少時輕離別志氣誇壯強及茲未莫年已復多感傷念  
昔之蜀都執經侍賢王故懷禮法地取樂文翰場耆俊  
滿大廷濟濟會冠裳出言有同趣講藝靡乖方惟王帝  
室英聰達世莫當精誠洞千古一目連十行道大才更  
雄氣溫色彌莊勞心撫庶政虛已思虞唐封內數十州

德聲藹洋洋皇天降嘉貺百穀屢豐穰盛美不自居檢  
身循典章凝情觀衆妙博問取所長自慚魯鈍學三歲  
承寵光避席玉座側設醴金殿旁睿哲能兼容闕失專  
覆藏采陟等葑菲比珍匪琳琅近者迎屬車拜辭褒水  
陽情真賜色笑感激銘肺腸喜遇大比秋齋官含晝涼  
寸情擬披豁古訓思對揚雖乏涓埃補忠貞誓無忘豈  
知事難必曩願弗獲償徵書京國來迅若晨風翔謬忝  
較文職守臣啓儲皇儲皇新德一作聽政出令聞八荒戒

飭況丁寧庸薄實恐惶經旬廢寢食嘔欬病在床王人  
俄繼至幣自藩閫將強起扶杖迎坐語兩徬徨報國固  
臣節效信亦士常趨召違天朝懼非義所臧王心秉忠  
孝處事明且詳微衷倘見察庶或貸死亡赫赫我大明  
幅員同夏商仁恩洽宇宙帝業熾以昌九有如一家內  
外咸樂康取士皆為國何嘗限封疆蜀道平若砥漢水  
淺可航胡為不能往矯首徒慨慷白日流光輝葵藿隨  
低昂願王崇明德以慰葵藿望

休日奉陪蜀府諸公晏集

居閑嘆時邁閱世知才短頻為觀國遊每覺歸期緩群  
公盡耆英過從恨殊晚他鄉親故稀骨肉不在眼非資  
談咏歡孰使離情展大藩仰仁哲政化崇寬簡長日自  
優游茲辰況休澣姓醪出珍賜果蔬隨物產一觴偶相  
酬萬慮皆可遣貴同周士肆狂笑晉人嬾語樂天趣深  
心清市塵遠新秋欣已至毒暑行將斷靈雨席上來微  
涼座中滿明時古難遇良會世所罕各勉存令猷垂聲

繼伊管

蜀府遇夏時教諭次韻叙德言懷

周道昔淪喪，鳳鳥收其聲。  
紛紛徇世士，各以智術鳴。  
仲舒起西都，蜀漢有孔明。  
下帷談正誼，濡走濟羣生。  
二子苟遇時，惠澤被孤惇。  
惜其遭逢謬，不見禮樂興。  
邇來一千年，文獻鮮有徵。  
豈無輔相貴，未免利祿嬰。  
鄙夫何所知，浪竊當世名。  
致君事莫及，好古心徒傾。  
身疲道路長，興入江山清。  
偶隨群臣後，獲見百代英。  
神姿儼淵肅，雄



論極醇精德政尚寬和  
西土臻治平福善固天理  
願治本民情昔嘆賢豪  
稀今見德位并寄言同  
袍子拭目王化行

閒居感懷十七首

鳴鳩知天雨乾鵲知天風  
蟋蟀最無知亦悲年運窮  
云何當世士憤憤溫飽中  
變故如波濤浮沉安所終  
鳳隨天風下暮息梧桐枝  
群鷗得腐鼠笑汝長苦飢  
舉頭望八荒默與千秋期  
一飽亮易得所存終不移

乘時功易立處下事少成君看蕭曹才豈若魯兩生賢  
豪志大業舉措流俗驚循循刀筆間固足為公卿

賢有四海志家無一金貲言高力不足舉世爭笑之不  
如富俠子錢刀散孤嫠閭稱行義赫赫名聲垂

竊竊衆所憂不踰衣食間孰知溫飽外可憂非一端賤  
憂道難行貴憂名不完誰能斷棄此自樂如孔顏

無事本無尤無作自無愧心超萬化表跡混人群內卑  
卑流俗語懶問亦懶對有時或出門獨撫霜中檣

庭前兩古檜封植今百年女蘿欺衰朽揚翹冠其巔弱  
榮蒲柳脆鉅榦金石堅得時不自料歲晚良可憐

我非今世人空懷今世憂所憂諒無他慨想禹九州商  
君以為秦周公以為周哀哉萬年後誰為斯民謀

士無及物智每喜華其廬我居豈不敝於道已有餘明  
取容吾身奧取藏吾書奚須嘆其陋不見阿房初

秦人奮戎狄蠶食舉八荒自言功德大傳緒萬世長鮑  
魚臭未絕赤龍歟飛翔巍巍且莫保瑣瑣安可量

習俗日頽壞疇能塞其源自從井牧廢開此爭敝門救  
弊豈無術得君古難言田間一卮酒跼酹蒼梧魂

道喪學術敝士心日汙卑躋扳得斗祿寧使節行隳古  
人安分義卿相有不為栖栖冀土中困處固其宜

俗士不知道喜以異自雄安知名世者固與常人同聖  
賢盡其常縱浪禮義中何須驚神變恟忼驚羣聾

內有邱山重外有秋毫輕於心不自得誰免慕榮名少  
賤事干謁尊貴樂驕盈焉知陋巷士塵芥視簪纓

利欲烈炎火雪燄起縱橫區區一子輿死以口舌爭豈  
不念迂遠安能負平生皇皇斯須困炳炳萬世明

胡貊笑紈綺吳越賤堅車群庸方囂囂固謂智士愚刀  
筆計得失絲粟較盈虛誰云周公聖對此慚不如

池魚不知海越鳥不思燕蚯蚓霸一穴神龍輕九天小  
大萬相殊豈惟物性然君子勿歎息彼誠可哀憐

次金華王仲縉感懷韻十首兼呈張廷璧

哲后踐貞軌簡策有餘馥彼或趨卑汙流惡寧有足明

達知所師鑑古以自燭惟王實天縱虛心湛無欲學道  
期濟人為善靡徼福群書不去手萬理瞭在目鄙臣守  
鉛槧恩光蒙遠矚穆如首夏風煦若陽春旭才微媿寵  
厚跡賤慚愛篤報德諒無階錫嘏徒有祝

東京多節士我懷管幼安騰身風塵表寵祿寧肯干子  
魚不相諒高位屢超遷腐鼠欲見污聞之媿心顏皜皜  
由夷姿迥出兩漢前彼哉阿世者變滅同飛烟榮華神  
所戲貧賤節斯完此道匪難知胡為人不然

福生既有胎福茂詎無根玄理諒不爽羣動何紘紘商  
周數百載積累甚至仁胤嗣豈皆賢所藉先澤存後王  
昧經遠謀慮止其身於道或偶合秉心殊未純永懷極  
盛時民物熙陽春孟氏好斥霸惡彼能亂真

隆中有一士卓然古天民長嘯六合間草昧思經綸寸  
心如白日可破萬古昏所遇雖不諧餘輝尚燉燉使逢  
高光主禮樂寧沉湮惜其遺書亡大志人罕聞如何徇  
利子於道不知真卑卑章句中微祿求潤身可貴不在

位可賤不在貧無取一時好當作千載人

翠鳥質微細乃以羽自戕犀象獸之雄每因齒角亡物  
生無巨小適用反相傷犬羊死柔弱虎豹死暴強彭聃  
死于壽夭者死於殤萬生誰長存所貴德譽光古來志  
節士立身有大方孰云蕭艾藂果勝蘭蕙芳

封倫論治道盛詆習俗漓鄭公若砥柱坐障狂瀾馳嗟  
此古遺直磊落胷中奇遭逢英明君計畫得小施劉蕡  
豈不偉結舌竟如癡浚恒寧獨然天運固若斯焰焰趨



愈下滔滔竟何之萬事吾不識聊以善自持

始見澤腹堅又聞谷風至炎燭復能幾木葉忽已墜四  
序不少停景物日夜異思之熱中腸不遑食與寐支離  
如病鶴顧影獨長唳黃雀飽稻梁笑爾垂兩翅

野性拙生理大化無停機緼袍汗沃若絺綌風淒其壯  
士千載心豈憂食與衣由來浮海志不是軒冕姿人生  
尚聞道富貴復奚為賢有陋巷樂聖有西山飢朶顧多  
所失苦節未可非

保身戒無疾制治憂小  
康苟操敬慎心何必求  
扁倉依桃李花安知有  
嚴霜松竹淡自守歲晚  
凌衆芳小人徒媿姁志  
士多慨慷我生豈不貴  
萬物備天常天常既無  
虧貧賤果何傷

榮華衆所慕志得虞咎  
愆賤貧可無憂復為飢  
凍纏有能外兩途逍遙  
循自然苟不悟斯道中  
心何由宣日子素寡昧  
未達性命原勵茲不息  
操夙夜靡遑安奮庸有  
伊周處約有騫淵敬承  
聖哲訓庶慰遲暮年

追次朱子春懷詩韻

聞鍾理短髮徐步啓荆扉不知夜雨過園林  
塤芳菲江山靜妙顏雲日浮清輝殘梅落欲盡  
幽池水痕肥始見新歲來景物忽如茲徒為逝  
川嘆未遂滄州期及時貴取樂莫遣青春歸

舟中呈同召葉夷仲林公輔楊大中陳元豐

一作采

本乏適時用誤為當世知進身媿蹇拙退處乃其宜  
何意承寵光使車忽來茲靡靡踰南國秩秩錫多儀  
嚴程

不可稽王命自有期親愛俱在眼弗獲顧我私聖猷同  
山嶽微忠劣毫絲龜勉諒何補徒興千載思

上已約友登南樓

生意忽滿眼不知春淺深良朋曠嘉會濁酒難孤斟迢  
迢城上樓高朗宜遠臨曷不一舉趾縱望淵與岑逍遙  
群動表舒豁萬古心古人已寂寞繼者應在今蘊真有  
至樂外慕非所欽疇昔舞雩詠千秋虞氏琴窮達各有  
適宇宙流遺音景風生穆清佳趣溢魚禽願言領衆妙

無為鬱沖襟

次韻

春色與漢水相看兩俱深誰能當此時有酒不共斟  
城端聳華構賓友皆來臨東瞻太白雪西望峩峩岑  
縱觀八紘內洞見天地心千年等旦暮豈識古與今  
尚友懷賢豪妄意鮮所欽慷慨隆中嘯窈眇河汾  
琴其人儼不妄思欲嗣徽音觴多意不盡譁笑驚  
飛禽清風似相知數數吹余襟

再次前韻

昔時喜飲酒舉白不辭深及茲中歲來已復畏人斟後  
生多所忽豈識老會臨志士惜景光登麓已知岑每聞  
前世事頗見古人心逝者良不息將來誰嗣今百年當  
有成泯滅寧足欽每憐伯牙陋鍾死破其琴自得苟堪  
傳何必求知音俯觀水中儵仰覩雲際禽真樂不吾隱  
欣然豁煩襟

送鄭叔貞之成都

謝公江海人雅量極宏廓中年別親友猶謂懷抱惡況  
我褊迫士志意早衰弱辟如遶指金詎耐膏火爍豈無  
骨肉親相望天一角兩生萬里至講道慰寂寞探竒忘  
舊悲觀妙有新樂寧知事多忤重使嘆離索林也前歲  
歸重來忘曩約鄭子今復去南行踰巖嶠成都壯麗地  
江水帶郭郭山窺子美堂雲護孔明栢壯遊豈不佳觀  
國資所學國僚盡耆俊政簡恒燕醪日開百金筵坐有  
四方客揮毫歌盛美文彩紛烜赫卓爾樂邦風巍乎王

者宅王誠天人秀令德顏閔若神機盡經緯大度蘊才  
畧心融群聖言穎銳智獨覺坐收千古秘萬理隨綜錯  
尚友師徽猷姚如靡間隔勵精施惠政民物沾德澤至  
化通幽明餘恩及飛躍小心事天子放意耽簡策道積  
不自盈怡怡躬吐握知名久佇望前席啓東閣立談盡  
歡娛至理無適莫從容倘垂問占對慎斟酌為言寡朋  
儔舊業愈荒落疑經待同勘蕪史期共削相須左右肱  
理勢不可各王仁極深廣夙昔受殊渥囊餘舊賜錢篋



有新頒帛身為微職絆感歎顏面忤使子能輸忠寧不  
副所托金門盛才彥德星耀井絡翩翩白鳳群豈復少  
一鶴惟茲山南郡士氣陋且薄古心莫與論積疾誰為  
藥願子早告歸離憂變歡噓四科洙泗道五等成周爵  
真知苟內充外物奚須度旱麓清照人漢水淺可濯懷  
哉春服成重繼咏歸作

又送叔貞之成都

空名誰當世自誤還勞人鄭子復為誰跋涉窮冬春去

年赴上國風雪迷江津徒步從我行面黑手足皴今茲  
有徵命欲往志靡伸子復之成都代余陳所因念子遠  
遊學三年別慈親敝衣犯緇垢斷裂莫為紉蜀道幸坦  
平王化甚惠仁歷覽快心目庶足忘苦辛諸葛政猶在  
少陵詩有神浩蕩觀大江穹秀瞻峨岷心胷蘊奇偉撫  
事氣益振丈夫平生懷豈惟安其身況可廣咨訪大邦  
多縉紳恨我不得俱惟恐孤主恩見王再三謝念此疎  
遠臣

偶爾遣意奉呈同學諸君子及示叔貞秀才

累物擾靈府澹然無所為家貧自鮮營萬事俱不知日  
祿餘一斗粗給菜與糜秫田亦易畊有酒供四時門多  
儒雅客暇則斟酌之相對靡俗言共談止書詩遐情或  
深契歡笑同解頤孰謂千古遠其人如在茲於心有至  
樂天地亦可遺未知軒裳貴詎識勢位卑彼美要路仕  
賢勞耀輕肥窮通各有適寧論是與非

送謝生因奉寄岐陽公

帝子謹王度大藩臻治平文風播南土四國揚休聲上  
公國懿親令德惟邦禎奉恩自夙昔脩貢表貞誠名馬  
西域來玉勒懸珠纓金門足麒麟特受顧盼榮王昨駐  
中都貂蟬藹盈庭公來必燕語禮接同友生異質況天  
挺至尊愛彌甥勲賢冠當世夷夏欽盛名繼美實在茲  
聞望良匪輕近因師傳重愈見德業成歷數傳萬年蒼  
生仰皇明豈徒本支盛股肱在公卿海內雖已康民俗  
猶未寧鄙夫抱深念思覩禮樂興願公善匡輔報主以

忠貞載光史臣籍永邁宗戚英靈雨洗南麓漢光晚來  
盈臨流送回使懷古動遐情

發褒城過七盤嶺宿獨架橋閣上

名為不祥器斯理昔未覺及茲困奔走始嘆立論確險  
哉七盤山羊腸凌巘嶠三年八往返顛頓髮早白此行  
當盛夏溽暑逞餘虐晝伏避蚤蚤宵征越林薄危橋帶  
褒水俯瞰波流惡鑿石勞衆工緣崖構飛閣下扶千柱  
壯上倚浮雲弱怒雷地底鳴懸瀑崖際落山中郵傳少

過客資棲泊勞者務苟安寧思非所托更闌急雨至洪  
濤相噴薄鬼神助晦冥天地混磅礴病身倦輾轉酣寢  
絕疑愕晨興霄景澄林壑還可樂有生大化中萬變相  
綜錯所遇聽自然何處匪安宅歷聘魯中叟詠歸沂上  
客勞逸命分殊順俟安敢擇

過潞陽

露濕塵不起曉行秋氣清遙

作瑶

天星未沒野草蟲亂鳴

途中何所見多見古軍營斷溝無新

作流

水荒隴存古城

為問戰者誰其人總豪英當時誇氣勢畢命恣紛爭但  
恨智力殫詎思時世更寂寞千載後艱勞竟何成身亡  
事即已得失存空名善者或稱嘆惡者受譏評因之念  
首陽西顧清風生感此默自嘆白日車前明

過寧陵縣學

師道古所重義與君父同自從東漢來節行著高風繫  
理或訴冤死請代以躬收塋與撫孤懇惻貫蒼穹聖賢  
垂大法勉孝兼勸忠豈聞訟其師擠寘圜圜中執憲者

何心此輩忍見容不惟紊人紀實斁上帝衷至理有相  
闕斯乃教化宗扶持罔失墜允藉參贊功末俗日悍驕  
童穉忘敬恭滔滔未有艾皞皞安所從我行聞怪事竊  
嘆徒傷恫誰操黜陟柄幸為懲頑亮

葺書齋舊門扇

安貧未必爾才拙本無能謬隨縉紳後誤以好道稱竭  
來忝一官行役歲屢仍風雪走沮洳舊路充炎蒸山南  
舊草堂居處不得恒前人遺構築一椽無暇增雙扇昔



所闢蠹版同春冰三年忘葺理啓闔繫以繩友生每謂  
予朴陋良可憎曷不稍脩治費少力易勝人生跡如寄  
外物豈須憑聖哲有廣居所貴心志弘雄都多甲第華  
懷映雕甍位崇德義薄鬼神見侵凌顧我田野人貧賤  
分所應庇身何必好取足容曲肱所冀對康時尊酒延  
佳朋春風日滿座涼雨宵同燈順理覲暮息養恬神慮  
澄庶幾謹素節弗畔顏與曾

感橙樹有作

有序

秋林道旁有橙樹處荆棘中不知幾何年矣會  
增置驛舍焚夷堂基斧斤幾及遇識者知其為  
菓實之美也獲免築室既成正值窓牖間結實  
纍纍然可愛過而見焉感而為之賦詩

橙生蜀山裏蕪沒荆棘塲荆棘忽剪除孤根虞見傷幸  
遇識者顧扶植不忍戕築室適在茲窓牖正相當花垂  
素雪盛葉茂青雲張方秋氣盛肅原野飛早霜衆木不  
復榮百草已罷芳纍纍枝間實爛爛半青黃摘置樽俎

間几席有餘作輝光豈惟巴人羨南服亦罕嘗鬼義帝王

宮異味來萬方何以解煩渴甘酪間蔗漿此物倘前陳  
玉食倍馨香可令積疾蠲坐見人情康惜無先容者盱  
彼途路長遇世良有會處已貴安常歲寒善自保用舍  
隨行藏

栽柏

迂拙乖世用每蘊無窮思取效非目前遠與千載期翠  
柏信良材成長計功遲茲晨斲煙雨移動盈尺姿清廟

嚴潔地聖靈會于斯豈無杞柳輩不足當階墀殷社夙  
所尚古制非徒為先師實殷人植此理固宜但恐枝幹  
弱不耐風霜欺培護苟無失終見盛大時三年過人長  
十年齊栢懷百年必合抱根深柯葉滋青霄泊鸞鳳厚  
土蟠蛟螭宣持傲寒暑將堪閱興衰所托況得所永免  
斤斧危既膺顧盼榮復與剪伐辭寥寥百世後神物相  
扶持何必為棟梁迺見材氣施流光若飛翰時代易推  
移行看好古士追說種者誰我生素多病中歲早孱羸

待為鶴髮翁見汝凌雲枝志士用心者  
獲落為世嗤何如群兒巧挿槿紛成籬

新栽栢為瓠蔓所纏令諸生披解以遂生意有作  
青青庭前栢移植芳春時既承雨露潤歛見雲霄姿盛  
夏乏人工眼中蕪穢滋瓠壺引長蔓左右纏蔽之晨興  
試行觀沉思喟然悲微物凌善類勝負關盛衰巨葉覆  
其顛濃陰密如帷自非為披折恐使嘉樹萎呼童操短  
鎌芟彼草與茨瓠蔓亦徐解扶持向藩籬植物共有生

榮枯兩無知貞脆本天質生成伏人為仰惟玄造心發  
育靡偏私於焉別臧否可以人理推漢昭任博陸不受  
群邪欺符堅逐仇騰景畧事業施用賢必速佞果斷貴  
無疑嗟余何為者棲屑名位卑觸物徒有懷於時竟奚  
裨栢也材氣良取效嘗患遲衆人重口腹愛飭固其宜  
紛紛俄頃計落落千載期浩歌向蒼穹此意知者誰

喜脩德汝器二君子偕嘉猷秀才至

宛宛心所慕盈盈日興思今辰果何祥舉目皆在茲經

時抱沉瘵杜門謝親知狷獨莫與徒有懷欲從誰聊求  
古人志遠與後世期放情簡冊間庶以靜自怡此意信  
似拙衆方背而馳非子秉冲襟疇能無棄遺敝廬面落  
日炎暑每相欺清談偶有適四座生涼颼久乏經世具  
孰正生民彝深哀鬱未宣流光迅難追慨餘喜胥會豈  
以慰我私相期樹斯道與國隆丕基

又

孟春期過我仲夏始來翔只尺同里居會合猶莫常何

况涉遠道各據天一方言歸雖有期心思詎能忘我如  
失群鶴斂翮雞鷺場時逢涼颼發仰首睇穹蒼子若隨  
陽鴈高舉隘八荒知時識天叙豈慕稻與粱哲兄富文  
學簪筆侍賢王愛國心事苦念親夢魂長朝退寢室靜  
閱書焚妙香賓僚各雨散思子不在旁子去義所安講  
道信有望山河壯都會圖譜有餘芳弔古考隆替撫時  
推興亡賈傳論過秦杜生賦阿房千秋繼奇偉亦足宣  
慨慷顧惟河洛間神邱鬱相當遠思百聖烈近想群賢



臧載瞻伊水濱二龍宣重光和貞各詣極崇眇交揮揚  
後來閩衡傑闡述爛昭章匪是啟靈秘正途已微茫願  
子奮遐躅整策趨康莊明明吾所懷暨暨宜力將幽獨  
靜自憫內視德甚涼方忻麗澤益乖析情增傷遲子即  
來旋緬跡鴛鴦行墜緒俟並緝他岐異同攘重開萬古  
昏再覩斯民昌深期實在茲抱瘵語莫詳行當重執手  
母使熱中腸

次鄭好義見貽韻五首

鄭子好古學天機靜而深沖然舞雩詠中有咸韶音茅  
舍帶流水琴書閱清陰遊魚戲晴波好鳥鳴遠林那得  
一笑樂洗此千古心

赤驥困皁櫪垂頭避駑駘王良振長轡蹴踏風雲開古  
來功名際何代無奇才當其未遇時誰免蒙塵埃丈夫  
亮有命勿使心顏頹

少時見白日意謂手可扳仰天邈無階狂走徒賴顏尺  
綆愧深汲寸管無全斑聖途千萬里用力恒苦艱安得

驂飛龍倏爾升天關

幼安老丘壑千載想高情鄙哉華子魚軒冕良可輕功  
名世不少孰與節義并至樂有天貴苟得非吾榮臨風  
發長歎欲為智者評

山中一樽酒慰此離別腸清夜步廣庭大星吐寒芒向  
來負奇氣舉目空四方栖遲盛年至留滯天南荒君看  
升帝閑不必真乘黃

乙丑中秋在石鏡精舍同士友翫月後二日家兄

寄示會飲分韻諸詩覽之悵然歎不得與因奉

次來韻兼柬東鄭君好義四首

我來南山中正見秋月圓我家豈無此兄弟況滿前胡  
為輕別離顧影清輝寒賴有座上客共結無窮歡愁端  
旋消釋言笑各開顏寄謝兄與弟明年相對看

秋霽月正好山谷氣逾清風簷敞虛牖愛此萬里明嘉  
賓自遠至樂飲暢高情雄談振林谷頓令懷抱傾叢桂  
困荊棘時來吐芳馨物生尚有待吾意詎無成且終良

宵會難值衆美并酒酣發長嘯似聞鸞鶴聲惟恐日易  
出顧影遶庭行

開樽酌月華酒味清且醺吐氣長風生吹滅天際雲此  
身與宇宙誰主復誰賓有生道為貴萬事何足論苦節  
慕夷齊延年稱羨門仙凡兩冥漠奸雄猶啖吞山棲未  
為隱頗喜離俗氛固窮固非潔用世豈吾仁

昏昏坐平旦兀兀行薄暮豈乏往來人幽懷寡清晤辭  
源湮曩濬理窟增舊錮幸子有佳期欣然寫衷素玄談

相應發妙理獨超悟頗憚尊酌煩易覺光景度詘身違  
道遠高世遭衆惡勉矣循大中心期永無斁

題山水

昔隱林壑中不知林壑美今年在城闕見之心輒喜楓  
林新受霜茅茨隔秋水安得呼扁舟遨遊五湖裏

楊柳渡

殘月墮瑤天涼風在高樹人行野色分鳥轉巖光曙川  
平愜幽眺境勝遺塵慮日出小舟橫依依楊柳渡

宿夾江寺

窻開覺山近院涼知雨足淡月透疎櫺流螢度深竹心  
空慮仍澹神清夢難熟起坐佛燈前閒抽易書讀

二蟲吟

翻翻暮光螢燭舉競飛附沒身煙焰間至死終不悟日  
月衆所瞻嗟汝不一顧雖有向明心所從良已誤  
喧喧秋後蚊白日嗜我肌我雖病無力掃撲亦易為憐  
汝營一飽未得死及之且復縱遣去天運自有時

郭西精舍士友同宿

淹懷終歲思幸際清宵會情深新喜集語愜孤愁退離  
居積頑鄙處下多尤悔倦翮謝騫騰羈蹤損貞介含悲  
靜自嘅抱獨招群怪非子不我遺斯心復誰賴天寒四  
野寂雲斂疎星大霜葉響枯條水灘咽鳴瀨振衣逞玄  
覽妙趣超塵壻靜沂一氣先虛涵萬象外林泉皆道情  
縻組本天械擺落已遺榮過從敢辭憊祛疑冀闕論立  
懦佇明誠頽風倘可還勗德斯無懈



追次文公先生歲莫燕集韻二首

靈臺湛無為一念寂不起外物紛相交飛揚千萬里哲  
人善操養淵澄復山峙所期天爵脩詎以貧賤恥豈無  
華軒客膏粱飫頑鄙道義竟無聞放浪徒自喜滔滔從  
俗化悄悄為誰美知言世所難感歎何時已

賢豪居廟堂四海為興起時乎有不遇淳風化閭里用  
為江河流處作喬嶽峙所逢異通塞內省無欣恥紛紛  
夸毘輩患失誠足鄙屈身營所欲易愠復易喜人生貴

聞道外物豈真美千載簞瓢生令聞傳不已

歲除祭先奉懷家兄次文公先生病中呈諸友韻  
日月行不息我亦少安居違家今幾何忽復五載餘微  
官悞人事解令親者疎每思別時語不見空中書及茲  
歲將闌感歎正躊躇祀先具薄奠撫已懷厥初觴酒豈  
云乏獨酌悶難祛寧當解組去御子花間車

遊石鏡山詩親友會集諸公回途有作

世道久凋喪斯文難合并駕言山中遊來與子同盟高

齋在深谷側徑防險行白日亦蕭散惟聞絃誦聲開筵  
動芳酌與客張華燈持盃恣歡謔聯床如弟兄凌晨起  
盥櫛披襟瞰前楹霜林凋綺葉秋花吐奇英百靈競紛  
集萬象森羅迎佳趣心已領新詩誰與評良會不可常  
俗慮仍相縈登途數回首暫別難為情迴溪屢曲渡清  
流堪濯纓離離莫雲合矯矯孤鴈鳴乘高望遙火髣髴  
識巖垆勞生幸脫鞅至道思服膺從君來借榻棲隱謝

浮名

再次石鏡精舍會集韻三首

風日淡秋晚欣此佳會并賢豪昔同調泉石非舊盟祗  
應念違別忽作山中行雄談為絕倒空谷騰歡聲論詩  
涉風雅深夜張華燈義交無老少情親如弟兄齋中二  
三子侍立環兩楹把酒起為壽禮秩交相迎丈人名文  
章落紙誠世英珊瑚與玉樹對之敢譏評乃知高世人  
不為塵俗縈秋空白雲散悠然暢遐情嗟予尚稚劣夙  
心會簪纓沉潛守編簡愁對寒蟲鳴豈知金石韻鏗鏘

振林垌重茲領秀句願言當服膺匪徼一時譽終期千古名

野性淡無嗜不求四美并喜茲二三友同結歲寒盟願  
言道義交豈慕青雲行山深寡轍跡地僻無囂聲曲几  
列遺編疎籬翳寒燈凝神對賢哲況共弟與兄幽蘭藹  
北牖脩竹羅前楹忽聞長者車倒屣欣趨迎貌匪山澤  
癯器乃邦國英揚論徹幽邃萬彙隨品評風雲時動盪  
川岳互迴縈磊落賢俊姿慷慨今古情不耽好爵貴飄

然解簪纓至今懷令望江海傳詩鳴奇懷寄竹帛安居  
守林垞小子來問道仰德思服膺從茲勉素業不媿知  
已名

太古日已遠轉覺浮偽并不聞金蘭契豈願敦盤盟浮  
雲無定態流水難西行滔滔勢利間豈識韶濩聲翻思  
機巧徒明滅風前燈閉門絕聞見所親惟父兄丈人忽  
來過雅淡振軒楹山禽競喧呼童穉亦歡迎清詩多古  
調妙論超時英富貴苟不累貧賤孰能縈羣賢共舒睡

萬物屬品評星斗羅奇襟風雲動高情瞿瞿世儀表濟  
濟古冠纓孰知枳棘間尚有鸞鳳鳴鰕生寡交接遊息  
在村垌偶茲觀美德夙興當服膺幸托龍門賞終期崇  
令名

病眼喜郡守見過

目疾不飲酒昏昏心意煩忽聞郡守至出戶強開顏況  
覩溫粹姿復聆豈弟言乃知盛明世屬任多才賢神歡  
坐忘疲欲起屢相援筍蔬雨餘美細酌林花間風煖落

英過日斜歸鳥喧苦云事填委未暇蘇痼瘵高位不易  
居斯民良亦難一夫或凍餒仁者為悲酸腐儒實無能  
教士慚素餐臨觴願有祝早使群黎安

題信可時經歷慰帛圖

聖主恩如天賜帛一萬匹承之錦繡段重之踰金壁西  
風摧刀尺將為君子衣慰貼既勻調榮榮光陸離防胡  
猶未已行役何當歸為君重著絮此地饒寒威

奉懷太史公用盡字韻



隆替存恒期含生會當盡獨遭誣枉構既往有餘愍哀  
彼草昧初遺黎困戈盾英雄逞割據未暇分壯北公來  
作著龜王畧見封畛上為宗社鎮下為邦國準旂常揭  
日月鍾磬羅簏簏諷諫陸賈多制作張華敏格天誠密  
運恤物涕潛隕氣回窮冬溫力導大川引竭忠職調護  
垂老辭疾疚謂可樂桑榆相從拾芝菌安知事乖謬玄  
造獨何忍顛頽萬里行流離闔門殞所餘已無幾猶受  
飢凍窘自顧受深知無能效賙賑是非屬公議不以窮

達泯終古仰大名昭回配箕軫紛紛榮辱論百世同一  
哂三嘆秋風前目送高飛隼

鄰父攜酒相飲

夷惠俱可慕清和合天真汨予流俗中豈暇思古人抱  
拙恥為佞遇物展殷勤雖無失已尤事過每自嗔隣翁  
偶相訪延坐列主賓為言林田登願我嘗其新巨榼傾  
濁醪雞黍雜前陳持盃強勸飲禮率意態親顧予寡德  
業無以給比隣何階及爾輩愧此風俗淳酒酣述往事

所歷多苦辛却憶全盛時無言指蒼旻世運有隆替玄  
造豈不仁父老且少安汝本三代民九重敦政教萬幾  
盡經綸行當被嘉澤鼓舞歌聖神

## 二禽咏

鵲噪未足喜鵲鳴未須憂天道神且遠微物徒喧啾翰  
音善司晨不免供肴羞鵲鵲至高潔所識惟林邱鴻鵠  
隘八荒但為稻粱謀文彩羨孔鸞繒繒或暗投況彼鵲  
與鵲志非衆鳥儔質陋羽翮短雲霄非所遊性貪嗜飲

啄逐逐不自休  
飢則搖口吻  
向人如有求  
何能洞先幾  
兆與天心侔  
禍福有定命  
所致各有由  
人理固坦夷  
鬼神良昧幽  
苟中存仁義  
自可無愆尤  
何須浪悲喜  
為禽鳥誑  
請來寅慰韓  
愈惡聲感黃  
州好怪失所  
守二子非英  
流吾方友千  
古遠法孔與  
周考祥視素  
履樂道以夷  
猶

敬次張南軒贈朱文公韻送董公

昔忝國士薦  
觀光帝王州  
強言酬顧問  
流汗對冕旒  
有

詔試文章下筆心懷羞退朝東閣下獲與夫子遊夫子  
燕薊來氣貌何休休至尊重純德特為儲王留出入朝  
兩宮寵恩正綢繆予時報聞罷歸飯田間牛升沉本命  
分出處非人謀安知十載後握手梁山幽蟲鳴月耿耿  
鴈度風颼颼話舊若夢中一笑忘百憂况茲林泉窟足  
以寓冥搜仰看岷峨峯俯視江漢流敬慎以為楫忠貞  
以為輶居夷聖所欲勿憚道阻脩

題童賢母卷後

南山有喬木柯葉敷重陰匪惟雨露滋土腴根本深童  
氏秉孝義兄弟同一心構獲良足多先澤久浸淫卓哉  
賢母行鄉邦迭嗟欽婦道盡恭睦庭訓肅規箴救殍  
廩粟收宗散籛金生業隨日增善積祥慶尋繩繩螽斯  
應玉立蘭芽森玄理諒靡僭令德斯鑒臨垂裕既有始  
濟美宜自今永言引弗替百世流徽音

應教恭賦靜妙軒

世故役群動方寸如旋蓬孰知神妙理乃在玄默中至

人本無為清明常在躬百念寂不起湛然與天通庶政  
或前陳聽斷每從容化原有餘地善應無留蹤齋居樂  
康時爐熏颺微風忘言對縹帙端拱師黃農茲惟文獻  
邦富庶古莫同載敷嘉靖治會見躋時雍

宋五公咏

李文靖公

李公安平相雅識極淵永惓惓閔無告扣陛日有請格  
君古不易慮國存要領紛然土木興始悟先幾炳

王文貞公

盛德每多容平世喜迂怪公操鎮靜量不幸當其會神  
書祀河嶽王府窮賞賚昭昭知過心寵祿有餘悔

寇忠愍公

寇公社稷臣識遠才亦果張皇澶淵狩佞幸慚計左青  
衫老作吏亦子淚交墮宏謨雖不終亦足振媮惰

范文正公

布衣憂社稷此義古亦然桓桓高平志致主二帝前時



屯道難合謗息名愈全繼明有良屑千載陋韋賢

司馬溫公

傾否難永圖拯溺有遺巧肫肫反正力誠節

作足動穹昊

羣邪競回適善政恣紛擾廢興豈人謀千秋仰元老

訊瘡

尊生道不足衛生亦無由微疴忽相侵坐為肢體憂疑  
水集寒氣挾續思重裘虐燄繼踵然締綌不願留陰陽  
各用事對處天一陬如何兩相值追逐同仇讐弱質受

推沮有似中喝牛有耳不解聰有目等無眸舌不辯辛  
甘鼻不別薰猶耳目口鼻官焦然共懷愁謂此果誰致  
試與天君籌吾觀今之人紛紜劇虺蜉日趨紅塵市夜  
醉笙歌樓緣情喪恒性縱欲戕天猷告之養壽命大怒  
不顧頭云胡反無疾健捷如猱猴方子頗好道少以禮  
自脩觀其居家庭未嘗暫嬉遊旦食不暇飽夕夢孔與  
周生疾豈有端天君亦知否天君聞之笑汝言理誠優  
子病殆天意皆非汝愆尤惟天生俊哲蓋為萬世謀大

欲扶三綱次欲叙九疇安能閉關卧縮首鳴啾啾孔孟  
處衰世奔走摧輪輶寧不懷晏安此道難中休天令所  
賦授與古豈不侔恐其不自強降疾警惰偷方子暫邁  
疾身疲面無膏忍見萬赤子病者半九州子能憂斯民  
厥疾當自瘳苟徒念一身壽考吾所羞耳受口以告目  
鼻涕泗流方子豁爾寤百體頓和柔再拜紀嘉言可以  
垂千秋

次脩德雜詩韻三首

通衢夷且直舉世所共知求端迷往輟顛躓終無歸達  
人解至理秉心若明曦敬恭視盤鑑齋莊整裳衣昭昭  
奉一德暨暨滅衆私為仁諒茲在彼狂胡弗思

制變易為失所貴謹未然本心秉靈德洞鑒媿與妍譬  
彼達海流出自山下泉積久諒益深雲濤鼓風煙始學  
誠已誤補過幸有年力微道尚遠感此徒煩悵

神龍卧深澤不若抱甕滋白日閔重陰不如寸燭輝賢  
豪初未遇但覺吾道非紛紛當途于權勢衆所歸兩生

困蓬藿屠販建旌麾斯事自古然今人安足悲

初冬雨中獨坐

吾廬混人群來往劇鼃黽頗欣夜雨來頓使蹤跡泯  
滔流水障悄悄耳目靜風窻試展書佳趣條已領平生  
煙霞癖夙昔慕箕穎抗懷軒冕上雅志星日炳寧知墮  
俗流汨沒未獲逞奇懷獨不忘幽念時自省豪雄外身  
名曠士賤鍾鼎欲語嗟莫同長歌碧林暝

雜詩四首贈林嘉猷

伊周不治經董賈不言文宏謨塞宇宙高論追典墳如  
何末代士操觚動成群但要言辭好不顧心志分至道  
豈難行彝倫人共聞勉哉不逮復恭默事天君循循勇  
不逮碩碩善或虧古人患才難可以當世推

自吾行四方所見多有之豈乏俊爽流未足慰我思聖  
道充天地其微入毫絲非精莫能察非敏莫能為致用  
貴不頗篤守在不移由來賢哲事皆本純粹資顧予亦  
陋劣前徽豈能追仰止二三友有過頻相規

操行一不慎坐取終身憂發言一不思或為萬世羞過  
小莫吝改進德勿厭脩誰能百無為自致孔與周

載籍彌九有群言劇毫毛棄置患術疎窮探畏心勞何  
由領其畧可使道藝高聖學亂百家忝稷雜莠蒿良農  
善別識培溉復芸嫗取大成吾身致用同伊臯彼哉溝  
澮魚豈足連九鰲

次韻贈國亮經歷

君侯昔筮仕匹馬之幽并先子守東藩始結鄰壤盟寧

知十載後握手山中行  
鬢髮白欲盡韜光復潛聲話舊  
若夢覺痛飲張華燈尚欣古義  
敦愛余均父兄雨洗秋色淨  
群山擁前楹山鳥喜客來飛鳴  
似相迎緬思天下士公是世外  
英流俗何所知紛紛好議評莫  
邪雖在土龍氣上迴縈自非冰  
鑑識誰知江海情談詩較李杜  
起舞笑絕纓大音久聞寥厭聽  
寒蟲鳴麟鳳居空谷何由在郊  
垌處世媿郭泰通家慚李膺  
巖棲倘有約相與葉榮名



雜詩四首

相如妙文辭高處無與敵多財為身累終老汙名蹟人  
生取予際千載觀令德苟富何足論喪節良可惜

好名未知道古人有揚雄著書欲傳世不暇脩厥躬聖  
言德之餘屈伸與天同哀哉大節廢豈足稱固窮

賈生信英才蚤識當世事身逢致治期遇主亦天意道  
高固難合流俗工媚忌一死尚足多千秋想奇氣

幡幡市井人出納量錙銖積財至千萬侈然夸有餘華

堂占廣陌列肆遍通衢朝餐聚俠客莫飲羅名姝一朝  
與法遇家破及妻孥金玉歸縣官不能贖其軀郭解既  
夷滅季倫亦門誅安知子原憲窮巷歌唐虞

脩德以詩寄次韻

藜羹淡無和腐粟春難圓羞將饋俗賓歡笑置子前子  
豈乏梁肉對之每欣然云胡恐費我來往動經年子行  
信勞止吾道良足憐深期挹嘉話不必枉華賤抱疔百  
日卧欲言無與朋敦敦守一床髮脫影如僧豈惟形容

悴智識無由增視此不棄捐子心一何弘細人忘名軋  
俗士為利情孰能使余慕君子固有恒營營苟得者恣  
以利易生徇欲遂忘反捐軀匪其情古人崇仁義講切  
極粹精於斯弗自得猩狖垂紳纓貴有不足懷賤有不  
足輕景公徒千駟子真豈其卿

再和井簡林嘉猷

夜光自有輝不因磨礪圓騏驥自致遠不以鞭策前古  
來知道者天質固使然師友發其微成德在早年余少

稍有慕今也反自憐子誠肯開我嘉言著來牋十年窮  
取友四海幾得朋豈惟得吾徒旁及老與僧自昔得王  
子勃鬱氣為增子才信已毅愧我德未弘所患涉道淺  
未免臨事惜何由與子隣講習日可恒溫溫我所愛處  
子有林生匪惟質柔嘉迥出遺世情從我南山遊斲雪煮  
黃精共悲狙喜怒靜閱猴冠纓生也尚審思勿言韋布  
輕巍巍孔孟業豈以為公卿

送一宗和尚次蜀王詩韻

有序

成都大慈禪師欽公一宗與余皆天台人雖所  
趨殊途而相見萬里之外有足樂者今將暫還  
故山謹次賢王殿下賜草堂長老詩韻以寓別  
情里中故人有相問者幸為謝之

浮雲出山中浩蕩隨去來來非有所係去亦忘所之若  
人釋門秀矯矯孤鶴姿林泉三十年喜譽如波馳平生  
西方學所蘊未及施一朝忽乘興來謁崑崙師微笑坐  
談空傾城走羣縉遂令好事者懶問子雲竒清香焚柏

子細雨洒楊枝相逢話鄉曲塵尾不暇麾越蜀萬里途  
各處天之陞胡為偶至此欲語忘其辭歷歷世間事星  
星髮中絲迢遙無所嬰老大祇自知巴江復舉棹故廬  
討遺基散懷天台月濯足槽溪漪我亦倦遊客歸耕有  
深期身在華山陽夢繞大海湄徘徊將何說祇恐負明  
時

家兄寄中秋會飲詩因分韻述懷以答

時過不自惜長年轉多憂壯心若湍水湧激不少休念

昔童稚日此身百無愁良宵見明月喜躍如有求大母  
方壽康諸祖未白頭開筵羅廣庭蔬果問穀繡先公奉  
觴起叔父迭獻酬玉立四五人文采皆琳瑯酒行聞雅  
歌鹿鳴何呦呦豈無辨難言禮義皆先猷脫畧輕萬事  
高視曠九州每卑楚漢業或誤良平謀奮袖時抵掌舉  
箸借前籌坐間二季父豪俊邈無儔慷慨頗蠡起自許  
公與侯酒罷寧復眠長吟倚危樓夜闌得繡句叩戶來  
相投我時被鍾愛兄弟共譁咻席賓欲亡酒輒笑牽衣

留轉眼二十年存亡兩悠悠庭闈音容絕門戶變故稠  
巢懷鶴上天雷行龍脫湫惟餘老仲父衰髮對清秋今  
歲月最好我適南山遊含情面樽俎感歎蓋有繇伯氏  
欲相寬新詩遞來郵發函清淚墮紙濕不可收永思舊  
所見一往如川流于今會飲歡頗似昔日不我家執衰繆  
難與時人侔譬彼百年屋不足施雕鏤願伯善扶持重  
使楹棟脩庶免傾壓虞百口蒙庇庥我愚更懶惰樸學愧  
前修術疎何所成言高每難讐空懷濟物志夢寐談孔



周歲華易為度自哂等浮漚長恐墜遺業上貽先人羞  
伯也幸閱我正救愆與尤復為戒諸弟敦睦無相猶道  
德在詩書為生視田疇天倫苟足樂外物皆懸疣骨肉  
豈異人風波同一舟持家尚禮讓處衆貴和柔堂構倘  
樹立梓杞加丹雘重還當時盛豈特才藝優世欲登虞  
唐吾將老林邱終期友愛樂黃髮叙綢繆深衷久有懷  
對月偶歌謳歌竟視天宇寒光衝斗牛

寄好義

同鄉不相見動涉秋去春何意忽來翔會合當茲辰雄  
談有遠趣文采驚世人譬彼隨和質衆目咸知珍陋俗  
乏奇士懷抱鬱未伸每思伊葛流磊落展經綸志大固  
難售心孤邈誰親君來起我意頗覺氣為振炳炳千古  
事悠悠三代民舉首視大荒汗顏慚此身深衷非一端  
欲語未及陳胡為復求去重使別恨新夙負江海情恥  
為兒女仁賢豪日哀謝感歎易悲辛涼風吹碧海月露  
洗高旻酒至且持飲言歸何所嗔

送友人之雲南教官

地遠會面難情深嗟別速  
今衝微雨去欲向誰家宿  
山城碧雲裏  
茆舍清溪曲  
莫厭官寂寥  
終期化夷俗

中山晨夜望東錢克溫

月落江水明疎鐘發林杪  
濛濛山氣合歷歷川光曉  
剡靜玄化機縱意群動表  
悠然悟真趣忽覺天地小  
是身本無累萬事相紛擾  
願釋經世情於茲共幽討

間居偶題

雨歇堦草淨鳥鳴叢竹中偶無輪鞅過遂與山林同晞  
髮庭際日振衣松下風自非捐世故誰得此相從

勉學詩十二首

殘燈結成花枯竹化為茵凋零如此物秀氣終未盡人  
心最靈智自棄獨何忍聖門本弘大梯磴多接引曾高  
愚魯資直解配顏閔流年急如箭髮白難再鬢及時不  
努力老大成蠢蠢

樹木生有枝子弟教及時七年異男女八歲分尊卑二

五學書計逢人多禮儀三五學射御四五加冠綏今來  
謾不省古道當如茲欲作高高臺為爾寬作基欲求深  
深井為爾遠為期不聞鄒孟學還自俎豆嬉人材日哀  
少善保膝下兒

兒童聚嬉戲不離父母傍父母顧盼之百憂為爾愴惟  
此慈愛心比同春日光陽和透地脈草木俱芬芳兒身  
已長大能不念往常愉色與婉容傾心奉高堂嗟哉力  
何短父母恩甚長

上堂拜父母甘旨手自供入廟羅豆籩祀我祖與宗死者魂魄安生者恩義隆一門無二志誓教生春風豈惟薰閭里上聞天九重祥雲及膏雨滋我庭下松孰云唐虞遠不得身遭逢由來豪傑士世世皆時雍

藹藹桑梓樹遲遲杖履音未瞻父母顏已起恭敬心樹木手所植杖履身所任此物猶足重況彼鍾愛深父愛我亦愛不間獸與禽六親同骨肉何以能相侵

莫驅屋上烏烏有反哺誠莫烹池中鴈鴈行如弟兄流

觀飛走倫轉見天地情人生處骨肉胡不心自平田家  
一聚散草木為枯榮我願三春日垂光照紫荆同根而  
並蒂藹藹共生成

妻賢少夫禍子孝寬父心不知何人語相傳猶至今室  
家兩相好如鼓瑟與琴二親豈不驪花木羅春陰雖云  
一樽酒共酌還共斟物情動相失安用儲千金家睽在  
婦德豕繫有遺音

布帛文被體粟菽味充飢常人未識察徃徃爭好奇貪

奇不願寶刻成無當厄大鈞播萬類瑣細各有宜得時  
易長養失叙徒施為哀哉楊朱淚滴向他路岐正途亦  
甚坦舍此將安之

蜘蛛解布網蛭蟻能轉圜萬物各有役何人得安然周  
公貴為相仰思夜不眠仲尼大聖人易書三絕編孰謂  
我有耳不聞古所傳一聞敢自墮勇志如奔泉

好龍非真龍藻繪等兒戲懼虎思虎傷聲容凜然異六  
經豈虛文中有無盡意一從河出圖光景不可閱皎皎




如日星悠悠在天地青編積几閣翻閱何容易曾參之  
一唯已往難再值

勸爾一盃酒君行莫匆匆君心雖欲速道路久乃通東  
可窺大壑西能越空同不憂歲月晚但憂筋力窮三年  
刻片楮九年成一弓制作雖云難為藝則已工小事可  
喻大願言置胃中

離離園中樹花開動無數或紅如丹朱或白如瑩素今  
日正自佳明晨不如故易盛還易衰浮華眼前度物情

何參差天地均雨露南山有松柏壽並金石固



遜志齋集卷二十三